

Can la chërta d'identità per ladin te Fascia?

L model é jà stat aproà a la fin del 2009, ma endèna no se pel amò l'aer

L model per la chërta d'identità bilingue, ence per ladin, che cogn vegnir durèda ti 7 Comuns del Comprenjorie ladin de Fascia, l'é jà stat dezià e ence aproà dal Minister de l'Intern.

Co la publicazion su la "Gazzetta Ufficiale" di 12 de dezember del 2009 del decret di 4 de november del 2009, l'é stat arjont n vèrch emportant tel ge dèr atuazion al decret legislatif nr 178 del 2006 su la Normes de atuazion del statut spezièl de la region Trentin Sudtirol, che tol ite la mudazions al decret legislatif nr 592 di 16 de dezember del 1993, su la sconanza de la popolazions de lengaz ladin de la provinzia de Trent. N zil emportant de chel percors de recognosciment giuridich di ladins de Fascia envià via amò jai egn da Bepe Detomas canche l'era deputat a Roma.

Ampò somea che mence amò vèlch sciaier per ruèr sunsom. Defat se ades n fascian va te so comun e l domana de se renovèr la chërta d'identità dijan che l vel chela te doi lengac, l se sent dir

L model de la chërta d'identità te doi lengac aproà dal Minister da durèr ti comuns de Fascia.

che no l'é amò possibol.

L decret defat l disc che i Comuns, dant de domanèr l model nef, i cogn fenir de durèr sù la chërtes de identità jà dates fora dal Proveditorat Generèl del Stat. Ogne Comun ge domana de outa

en outa al Comissariat de Goern n cert numer de chërtes – che les é numerèdes – che l peissa che posse ge bastèr per dut l'an. Soul che de jugn del 2008 l'é stat aproà n decret che perveit che la validità de la chërtes dates fora dò da jugn

del 2003 posse vegnir sperlongèda demò con n scrit e n stempel del Comun, senza che se cogne les fèr de nef. Chest à smendrà sessaben debel l numer de la neva chërtes domanèdes te comun, e te vigni comun n'é restà n bon numer de chela veies da fèr fora.

Cotant cognarèi spetèr donca i fascegn per poder aer a la leta sia chërta d'identità ence per ladin, ades che la é stata aproèda apontin per meter en doura la normative che ge arseguera chest derit ai ladins?

Te vèlch comun i fèsc cont de n'aer amò per passa n an, e cheles col model veie demò per talian che i darà fora per dut chest temp les arà regnèda per 10 egn. Chest vel dir che cognarà passèr amò n muion de egn inant che duc i ladins de Fascia posse aer sia chërta te doi lengac, descheche la normes pervedessa.

E endèna magari ruarà la chërtes digitèles e dut l'iter de aproazion del model sarà stat dejutol. L'é vera che per chel che vèrda la chërtes digitèles la costion

é fosc amò più senestra, ajache con la gran speises e i problemes de segurezza che domana i aparac per dèr fora chesta chërtes, sarà senester che i picoi comuns i posse se la enjignèr.

La risposta podessa ruèr dal Comun General de Fascia che, pur senza ge tor la partegnuda a ogneun di set comuns de Fascia, l podessa tor dant vèlch costion n'outa soula e a na vida valiva per duc.

Na strèda che amò no é stata verifichèda l'é per ejempie se fossa l met de ge dèr de retorn al Comissariat del Goern la chërtes demò per talian che l'é restà ti comuns de Fascia per aer al più prest cheles ence per fascian. Ma ampò ence chest percors podessa aer più peis e maor ejit se la jent de Fascia domanassa con maor forza te si comuns de poder aer l nef model, desmostran de ge tegnir a aer n document che palesa, ence tel lengaz durà, sia identità spezièla, e no l desmentia de meter ence l lengaz ladin apede a chel talian. (lg)